



ԵՐԵՎԱՆԻ ՔԱՂԱՔԱՊԵՏԱՐԱՆ

ՈՐՈՇՈՒՄ N° Կ- 25/10

«ՎԱՐՉԱԿԱՆ ՏՈՒՅԺ ՆՇԱՆԱԿԵԼՈՒ ՄԱՍԻՆ»

ք. Երևան

« 22 » հունիսի 2022թ.

1. Վարչական իրավախախտման վերաբերյալ գործի նկարագրությունը.

Երևանի քաղաքապետարանի աշխատակազմի առևտրի և սպասարկումների վարչության աշխատակիցներ Ա. Ոսկանյանի և Ա. Սահակյանի կողմից 26.05.2022 թվականին հայտնաբերվել է Վարչական իրավախախտումների վերաբերյալ օրենսգրքի (հետայսու՝ Օրենսգրքը) 158-րդ հոդվածի 1-ին մասով նախատեսված վարչական իրավախախտում, մասնավորապես՝ «Եվա և Սյուզի» սահմանափակ պատասխանատվությամբ ընկերության տնօրեն Գոռ Ալբերտի Գևորգյանի կողմից Երևան քաղաքի Սունդուկյան փողոցի հ. 9 հասցեում գտնվող առևտրի օբյեկտում իրականացվում էր պիտանիության ժամկետն անցած՝ «Բիելլա» ֆիրմայի երշիկների, «PREZIDENT» ֆիրմայի «Нежный» ապրանքանիշի մայոնեզների՝ 6 հատ, «Մարիաննա» ֆիրմայի կաթի՝ 1 հատ, «Ստեփանավան» ֆիրմայի ձվի իրացում, որի վերաբերյալ 26.05.2022 թվականին կազմվել է վարչական իրավախախտման վերաբերյալ թիվ 003516 արձանագրությունը (հետայսու՝ արձանագրություն):

Որպես իրավախախտման փաստը հաստատող ապացույց, իրավախախտման հայտնաբերման պահին իրավախախտման վայրում տեսանկարահանվել և լուսանկարվել են պիտանիության ժամկետն անցած ապրանքները:

Հայտնաբերված իրավախախտման փաստով Երևանի քաղաքապետարանի նախաձեռնությամբ հարուցվել է վարչական վարույթ:

«Եվա և Սյուզի» սահմանափակ պատասխանատվությամբ ընկերության տնօրեն Գոռ Ալբերտի Գևորգյանը ծանուցված լինելով 22.06.2022 թվականին կայանալիք գործի քննության տեղի և ժամանակի մասին չներկայացավ, ուստի Օրենսգրքի 267-րդ հոդվածի 1-ին մասի համաձայն գործը քննվեց վերջինիս բացակայությամբ:

2. Գործի լուծման համար էական նշանակություն ունեցող ապացույցները.

Գործի քննության ընթացքում՝ որպես մեկ համակցություն, հետազոտվեցին արձանագրությունը, հ. 135 հանձնարարագիրը, ընկերության պետական գրանցման վերաբերյալ տեղեկատվությունը, Երևանի քաղաքապետարանի աշխատակազմի առևտրի և սպասարկումների վարչության աշխատակիցների 26.05.2022 թվականի «Բացատրագիր» վերտառությամբ գրությունը, հսկողության իրականացման ժամանակ կատարված պիտանիության ժամկետն անցած ապրանքների լուսանկարները և տեսանյութերը:

3. Գործի քննությունն իրականացնող իրավասու պաշտոնատար անձի ներքին համոզմունքներով ձևավորված պատճառաբանությունները և եզրահանգումը.

Գործի փաստական հանգամանքների և դրանում առկա բոլոր ապացույցների բազմակողմանի, լրիվ և օբյեկտիվ հետազոտման արդյունքում պարզվեց և հիմնավորվեց, որ 26.05.2022 թվականին «Եվա և Սյուզի» սահմանափակ պատասխանատվությամբ ընկերության տնօրեն Գոռ Ալբերտի Գևորգյանի կողմից Երևան քաղաքի Սունդուկյան փողոցի հ. 9 հասցեում գտնվող առևտրի օբյեկտում իրականացվում էր պիտանիության ժամկետն անցած՝ «Բիելլա» ֆիրմայի տարբեր տեսակի երշիկների՝ 7 հատ, «PREZIDENT» ֆիրմայի «Нежный» ապրանքանիշի մայոնեզների՝ 6 հատ, «Մարիաննա» ֆիրմայի կաթի՝ 1 հատ, «Ստեփանավան» ֆիրմայի ձվի՝ 1 տոբի իրացում:

Պիտանիության ժամկետն անցած ապրանքները գտնվել են առևտրի սրահում՝ գնորդի համար տեսանելի և հասանելի վայրում:

«Եվա և Սյուզի» սահմանափակ պատասխանատվությամբ ընկերության տնօրեն Գոռ Ալբերտի Գևորգյանի կողմից թույլ է տրվել Օրենսգրքի 158-րդ հոդվածի 1-ին մասով նախատեսված վարչական իրավախախտում:

Հաշվի առնելով, որ «Եվա և Սյուզի» սահմանափակ պատասխանատվությամբ ընկերության տնօրեն Գոռ Ալբերտի Գևորգյանը չի ներկայացել գործի քննությանը, որի շրջանակներում հնարավորություն ուներ ներկայացնելու բացատրություններ և պարզաբանումներ՝ իրավախախտման հետևանքների վերացրած լինելու մասին, որի վերաբերյալ չի ներկայացրել նաև որևէ զրավոր դիրքորոշում, իսկ վարչական մարմինն իր միջոցներով հնարավորություն չի ունեցել ձեռք բերել այնպիսի փաստական հանգամանքներ, որոնք քննարկվող գործի նկատմամբ առավելապես կարող էին ունենալ զանցանքը մեղմացնող վարչական մարմնի հայեցողական լիազորության իրացման համար, ինչպես նաև հետազոտելով գործում առկա բոլոր նյութերը, հետևում է, որ տվյալ դեպքում առկա չէ վարչական իրավախախտման համար պատասխանատվությունը մեղմացնող հանգամանք:

4. Վարչական ակտ ընդունելու իրավական հիմքերը.

Օրենսգրքի 9-րդ հոդվածի համաձայն՝ Վարչական իրավախախտում (զանցանք) է համարվում պետական կամ հասարակական կարգի, սոցիալիստական սեփականության, քաղաքացիների իրավունքների և ազատությունների, կառավարման սահմանված կարգի դեմ ունեցվող հակաիրավական, մեղավոր (դիտավորյալ կամ անզգույշ) այնպիսի գործողությունը կամ անգործությունը, որի համար օրենսդրությամբ նախատեսված է վարչական պատասխանատվություն:

Սույն օրենսգրքով նախատեսված իրավախախտումների համար վարչական պատասխանատվություն առաջանում է, եթե այդ խախտումները իրենց բնույթով քրեական պատասխանատվություն չեն առաջացնում գործող օրենսդրությանը համապատասխան:

Օրենսգրքի 158-րդ հոդվածի 1-ին մասի համաձայն՝ առանց պիտանիության ժամկետի, պիտանիության ժամկետն անցած, ոչ ընթերցելի պիտանիության ժամկետով, պիտանիության ժամկետի կրկնակի մակնշմամբ, արտադրողի կողմից նշված բնօրինակ պիտանիության ժամկետը ջնջված և նոր ժամկետի նշումով, հայերեն մակնշումը արտադրողի կողմից նշված բնօրինակ պիտանիության ժամկետի վրա փակցված ապրանքներ իրացնելը առաջացնում է տուգանքի նշանակում պաշտոնատար անձի նկատմամբ՝ սահմանված նվազագույն աշխատավարձի հարյուրապատիկից մինչև երկուհարյուրապատիկի չափով:

Ելնելով վերոգրյալից և ղեկավարվելով Օրենսգրքի 23-րդ հոդվածի 1-ին մասի 2-րդ կետով, 34-րդ հոդվածով, 158-րդ հոդվածի 1-ին մասով, 219.1-րդ, 252-րդ, 281-րդ և 282-րդ հոդվածներով, Երևանի քաղաքապետի 30.05.2022 թվականի թիվ 1986-Ա որոշմամբ՝

ՈՐՈՇԵՑԻ

1. «Եվա և Սյուզի» սահմանափակ պատասխանատվությամբ ընկերության տնօրեն Գոռ Ալբերտի Գևորգյանին Օրենսգրքի 158-րդ հոդվածի 1-ին մասով ենթարկել վարչական պատասխանատվության՝ նշանակելով վարչական տույժ 200.000 (երկու հարյուր հազար) ՀՀ դրամ գումարի չափով:

2. Օրենսգրքի 305-րդ հոդվածի համաձայն տուգանքը պետք է վճարվի սույն որոշումն իրավախախտում կատարած անձի կողմից ստանալուց ոչ ուշ, քան տասնհինգ օրվա ընթացքում՝ կենտրոնական գանձապետարանի N 900015211239 հաշվեհամարին:

3. Սույն որոշումը կարող է բողոքարկվել վարչական կարգով՝ որոշումն ուժի մեջ մտնելուց հետո երեսուն օրվա ընթացքում, իսկ դատական կարգով՝ երկամսյա ժամկետում:

ԻՐԱՎԱԲԱՆԱԿԱՆ ՎԱՐՉՈՒԹՅԱՆ
ՊԵՏԻ ՏԵՂԱԿԱՆ



ԱՐԱՄ ՄԱՐՏԻՐՈՍՅԱՆ